

Ni Pangulong Henry B. Eyring

Unang Manuglaygay sa Unang Panguluhan



# Armado sang Pagkamatarong

**A**ng propeta sang Dios sa duta, si Pangulong Thomas S. Monson, nagpahayag, “Sa karon nga panahon, nagpangatubang kita sang pinakadaku ku nga sari sang sala, bisyo, kag kalautan nga natipon sa atubang sang aton mga panulok.”<sup>1</sup>

Makibot bala kami kon inyo mahibal-an nga ginmitlang ni Pangulong Monson inang mga pulong 50 katuig na ang nagligad? Kon nagpangatubang kita sang indi matupungan nga sari sang kalautan sadto, ano pa gid ayhan kadaku ang nagahana nga kalautan sa aton sa karon? Sa maayo nga rason, ang Ginuo nagpahayag sa aton dispensasyon, “Tan-awa, ang kaaway natingob” (D&C 38:12).

Ang giyera sa diin “tanan kita nagapasakup”<sup>2</sup> nagsugod antes pa kita natawo sa sining kalibutan. Nagsugod ini bisan antes pa gintuga ang kalibutan. Nagsugod ini madamo nga milenya ang nagligad sa ginharian antes sang kabuhi sa duta, sa diin si Satanas nagrebelde kag nagtinguhha sa pagdula sang pagbulut-an sang tawo” (Moses 4:3).

Napierde si Satanas sa amo nga inaway kag “ginhulog sia sa duta” (Bugna 12:9), sa diin ginapadayon niya ang iya giyera sa karon. Diri sa duta “nagapakig-away sia sa mga santos sang Dios, kag ginapalibutan sila” (D&C 76:29) sang mga binutig, pagpatalang, kag mga tentasyon.

Nagaaway sia kontra sa mga propeta kag mga apostoles. Nagaaway sia kontra sa layi sang kaputli kag kasagrado sang kasal. Nagaaway sia kontra sa pamilya kag sa templo. Nagaaway sia kontra sa kon ano ang maayo, balaan, kag sagrado.

Paano kita magbato sa amo sina nga kaaway? Paano kita mag-away kontra sa kalainan nga dawsa nagalamon sang aton kalibutan? Ano ang aton taming? Sin-o ang aton mga kadampig?

## Ang Gahum sang Cordero

Ang Propetang si Joseph Smith nagpanudlo nga si Satanas may gahum sa aton tubtub lamang sa punto nga ginatugutan naton sia.<sup>3</sup>

Nga napanan-aw ang aton panahon, si Nefi “nakakita sang gahum sang Cordero sang Dios, nga nagpanao ngini sa mga santos sang simbahan sang Cordero, kag sa katawhan sang kasugtanang sang Ginuo, nga nag-alaplaag sa bug-os nga kadaygan sang duta; kag *ang ila hingani-ban amo ang pagkamatarong kag kaupod ang gahum sang Dios sa daku nga himaya*” (1 Nefi 14:14; pagdagmit gindugang).

Paano naton maarmasan ang aton mga kaugalingon sang pagkamatarong kag gahum? Ginatipigan naton ang Adlaw sang Pagsimba nga balaan kag ginatahud ang priesthood. Nagahimo kita kag nagatipig sang sagrado nga mga kasugtanang, nagahikot sang aton family history, kag nagatambong sa templo. Nagatinguha kita pirme nga maghinulsol kag nagaampo sa Ginuo nga “gamiton ang nagpasag-uli nga dugo ni Cristo agud nga makabaton kita sang kapatawaran sang aton mga sala” (Mosias 4:2). Nagapangamuyo kita kag nagaalagad kag nagasaksi kag nagagamit sang pagtuo kay Jesucristo.

Ginaarmasan man naton ang aton mga kaugalingon sang pagkamatarong kag gahum sa aton “dalayon nga paghatag bili sa [aton] mga hunahuna sang mga pulong sang kabuhi” (D&C 84:85). Ginahatagan naton bili inang mga pulong paagi sa aton pagpamalandong sa balaan nga mga kasulatan kag sa mga pulong sang pinili nga mga alagad sang Ginuo, nga magapaambit sang Iya pagbuot, hunahuna, kag tingog (tan-awa sa D&C 68:4) sa tion sang pangkabilugan nga komperensya sa madason nga bulan.

Sa aton away kontra sa kalainan, dapat gid naton pirme dumdumon nga may bulig kita halin sa pihak kag pihak sang tabon. Ang aton mga kadampig amo ang Dios, ang Wala'y Katapusan nga Amay, ang Ginoong Jesucristo, kag ang Balaan nga Espiritu.

Ang aton mga kadampig nagalakip man sang indi makit-an nga kasuldadohan sang langit. “Dili ka magkahadlok,” siling ni Eliseo sa nahadlok nga lamharon nga lalaki sang sila nagapangatubang sang kasuldadohan sang kalainan, “kay ang mga nagaupod sa aton madamo pa sa mga nagaupod sa ila” (tan-awa sa 2 Mga Hari 6:15–16).

Indi kita kinahanglan magkahadlok. Ang Dios nagapalangga sa Iya mga Santos. Indi gid Niya kita pagtalikdan.

Nakahibalo ako nga ang Dios, sa pagsabat sang pangamuyo, nagtuman sang akon mga pag-ampo nga luwason ako sa kalainan. Nagasaksi ako nga sa bulig sang Dios nga Amay, sang Manluluwas sang kalibutan, kag sang Balaan nga Espiritu, makasalig kita nga hatagan kita sang sobra sa nagakaigo nga gahum agud mabatuan ang kon ano man nga malain nga mga puwersa ang aton ginaatubang.

Kabay nga pirme kita mangin armado sang pagkamatarong agud nga makaangkon kita sang pagsalig sa kadalagan sa katapusan.

#### MGA TANDA

1. Thomas S. Monson, “Correlation Brings Blessings,” *Relief Society Magazine*, Abr. 1967, 247.
2. “We Are All Enlisted,” *Hymns*, no. 250.
3. Tan-awa sa *Teachings of Presidents of the Church: Joseph Smith* (2007), 214.

---

#### PAGTUDLO GIKAN SA SINING MENSAHE

Si Pangulong Eyring nagapanumendum sa aton nga nagapakig-away kita sa kalainan. Mahimo kamo magsugod paagi sa pagkanta sang “We Are All Enlisted” (*Hymns*, no. 250) upod sang inyo ginabisitahan. Dayon mahimo ninyo sila agdahon nga magpaambit kon paano sila naprotektahan paagi sa pagkamatarong

kag magpanumendum sang mga paagi nga maprotekthan ang ila pamilya kontra kay Satanas, pareho sang pagpili sang maayo nga mga balasahon kag talawan, paghiwat sang mga family council, ukon paghiwat sang family home evening kada semana. Mahimo ninyo sila hangkaton sa pagbinagbinag sing mapinangamuyon kon paano ipasad ang mga pamakod sang ila panimalay kag paisogon sila sa paghimo sang plano agud ipatuman ang ila mga ideya.

## LAMHARON

### Nakadesisyon Na Ako

Iya ni Madison Thompson

**N**akabaton ako sadto sang isa ka importante nga leksyon sa isa ka klase sa Young Women parte sa sekswal nga kaputli—isa ka topiko nga nagpaaliwasa sang madamo nga mga lamharon sa ila mga pulungku-an. Indi ko madumduwan ang tanan nga natun-an ko sadto nga adlaw, pero madumduwan ko ang akon lider nga nagahambil parte sa isa sang iya mga personal nga pagsulundan—nga magpabilin pirme nga sekswal nga maputli. Ang iya mga pulong nagpabilin sa akon, kag dayon nagdesisyon ako sing hungud sa buot nga himuong ini nga isa sang akon kaugalingon nga personal nga mga prinsipyo.

Isa ka adlaw sang nagasakay ako sa bus pauli halin sa isa ka kahiwanan sa hinampang, may isa ka pasahero nga nagsugod sang isa ka hampang sang truth or dare [mag-ako ukon maghimo]. Kay natakan, ang pila sang iban nga mga kabataan kag ako nag-entra. Sang nag-abot ang akon turno, ginhangkat ako nga himuong ang isa ka butang nga nahibaloan ko nga indi husto. Mabudlay kuntani ini nga desisyon para sa akon, pero ang mga pulong sang akon lider sa Young Women nagsulod sa akon hunahuna, kag ang pagpili nangin mahapos. Madasig ako nga nagpamalibad. Nahuman ko na sa akon hunahuna kon ano ang akon himuong sa sina nga sitwasyon.

Nakahibalo ako nga kon magsimba kita kag maghatag sang lugar para sa mga butang nga ginatudlo dira, bugayan kita sang daku nga espirituhanon nga kabakod kag proteksyon gikan sa mga tentasyon sang kalibutan. *Ang tagsulat nagaistar sa Utah, Estados Unidos sang Amerika.*

## MGA KABATAAN


### Isul-ob ang Inyo Taming

**M**ay madamo sang malain nga mga butang sa kalibutan sa karon. Ang ebanghelyo pareho sang isa ka taming nga nagaprotekta sa aton. Basaha ang 10 ka mga butang nga ginhambal ni Pangulong Eyring nga aton himuong agud maprotektahan ang aton mga kaugalingon. Dayon drowinga kag kolori ang inyo kaugalingon nga taming!

1. Tipigan nga Balaan ang Adlaw sang Pagsimba
2. Tahuron ang priesthood

3. Maghimo kag magtuman sang mga kasugtanang
4. Maghikot sang family history
5. Magkadto sa templo
6. Maghinulsol
7. Magpangamuyo
8. Mag-alagad sa iban
9. Magpaambit sang inyo panaksihon
10. Magbasa sang balaan nga mga kasulatan

© 2017 iya sang Intellectual Reserve, Inc. Tanan nga kinamarong ginahuptan. Ginbalhag sa Pilipinas. Petsa sang pagtugot sa Ingles: 6/16. Petsa sang pagtugot sa paglubad: 6/16. Paglubad sang *First Presidency Message, March 2017*. Hiligaynon. 97923 861



# Ang Nagasakdag nga Gahum ni Jesucristo kag sang Iya Pagpasag-uli

*Tun-i sing mainampuon ining materyal kag magpangayo sang inspirasyon agud mahibaloan kon ano ang ipaambit. Paano bala ang paghangop sa katuyuan sang Relief Society nagahanda sa mga anak nga babayi sang Dios para sa mga bugay sang kabuhi nga wala'y katapusan?*

**M**akahimo ako sang tanan nga butang paagi kay Cristo nga nagapabakod sa akon” (Mga Taga-Filipos 4:13). “Bisan pa tanan kita may mga kahuyang, mahimo naton madaug ang mga ini,” siling ni Pangulong Dieter F. Uchtdorf, Ika-duhang Manuglaygay sa Unang Panguluhan. “Matuod gid nga paagi sa grasya sang Dios, kon magpabos kita kag magtuo, ang maluya nga mga butang sarang mangin mabaskog.”<sup>1</sup>

Ang aton Manluluwas nagasiling sa Doctrine and Covenants, “Maga-panguna ako sa inyo atubangan. Mangin yara Ako sa inyo natuo nga kamot kag sa inyo nawala, kag ang akon Espiritu mangin yara sa inyo mga tagipusuon, kag ang akon mga anghel magapalibot sa inyo, sa pagtib-on sa inyo” (DC 84:88).

“Si Nefi ehemplong isa nga nakahibalo, nakanhangop, kag nagasalig sa nagasakdag nga gahum sang Manluluwas,” siling ni Elder David A. Bednar sang Korum sang

Napulo’g Duha ka mga Apostoles. “Ang mga utod nga lalaki ni Nefi naggapos sa iya sang mga lubid kag nagplano sang iya kahalitan. Palihog tandai ang pangamuyo ni Nefi: ‘O Ginuo, suno sa akon pagtuo nga yara sa imo, itugot nga maluwas ako gikan sa mga kamot sang akon mga utod; huo, *hatagi ako sing kusog agud akon mabugras ining mga lubid* nga nagagapos sa akon’ (1 Nefi 7:17; pagdagmit gindugang).

“... Si Nefi wala nagpangamuyo nga kambyohon ang iya kahimtangan. Kundi, nagpangamuyo sia para sa kusog agud kambyohon ang iya kahimtangan. Kag nagapati ako nga nagpangamuyo sia sa sini nga paagi tungod pat-od gid nga iya nahibaloan, nahangpan kag naeksperiensiahan ang nagasakdag nga gahum sang Pagpasag-uli.

“Wala ako nagapati nga ang mga lubid nga gingapos kay Nefi milagro lang nga nagkalahukas sa iya mga kamot kag mga pulso. Kundi, sa akon suspetso ginbugayan sia sing

alangay kaukod kag personal nga kabakod nga sobra sangsa iya masarangan, agud nga sia ‘sa kusog sang Ginuo’ (Mosias 9:17) nagpangabudlay kag naglubag kag nagbutong sang mga lubid kag sang ulhi iya gid nasarangan nga bugtuon ang mga gapos.”<sup>2</sup>

## Dugang nga Balaan nga mga Kasulatan kag Impormasyon

Isaias 41:10; Eter 12:27;  
[reliefsocietylds.org](http://reliefsocietylds.org)

### MGA TANDA

1. Dieter F. Uchtdorf, “The Way of the Disciple,” *Liahona*, Mayo 2015, 108.
2. David A. Bednar, “Strength beyond Our Own,” *New Era*, Mar. 2015, 4.

### Binagbinaga Ini

Paano bala ang nagasakdag nga gahum ni Jesucristo kag sang Iya Pagpasag-uli nga sakripisyo nagabulig sa paghimo sang aton mga kahuyang nga mangin kabakod?